

Littera

*Liibar Vroint Josef,
Holtz- un Kolvorkofar ka Padebe*

Dar Langoz ist kemmet ane daz ich gratulire den dain Namentag – Vorgibmar. Du boz von 'me pösen Bintare, ba hear ist inkandet: zben pöse Manote, Jeneer un Febrear, hia atte Perge Bind un Snea ganûg. Dar Bind hat gamacht groze Schade in Bald, vil Voichten mit den Burzen übargaraizt, in de Lentar vil Tächar abegadeckt, alle de Loite dorschreckt von den grozen Plasarn. Darnach ist kemmet der Snea drai Vüze hoach in 'z Land, un zbelve at te hogen Perge. Dar Rego hat 'machet áparn in Podom von Bisen un von Eckarn. Ich pin noch lange gabest ka Mitteleballe, ba du hast mich galazt at den lesten Grüz. In disa Zait han ich auzgatraget Gutez un meror Pösez, in mitten Vrost hütenten de Sichekot von gapunten Fameien von Beame Halze, Scarlatin, Börme un Vibar un Gasbollet. Ich pin noch gasant un ste-da gearn. Libar Vroint, baz elene Tage saint gabest hia in mitten sovel arme Loite, ba habent drai viar Kindar siiche' in 'z Pette, in vil Hoisar asó, un aitel schöne von 4 at-te 14-15 Jar alt; un sötane saintar da an 50 gastorbet, de mearsten vorgrabet pa dar Nacht mit 'me Lichte von dar Lantern, in dez pöseste Bettar,

Bind un Sneahaufen vorbent, de Bege gasperret mit hogen Röne Snea, ba de main Manne habent gastrumfelt vüerten in Slitten un 'z Paur drauf mit den Toaden drin, gazoget un gasbitzt in di pösen Tritte zo ghenan in Vraithof, in de vrüjen Orn in Morgond odar de speten Abond, pa dar Nacht tunkel. Hia alle habent gasüünt; du mac net kloban bivel Gaschraigach, Soif-tar, gagoilt habent de armen Eltern, ba habent vorloart de liben Kindar. An Mutar hat gaklaget iar Diarnle asó: ah, maina Maria, libez gutez Kind, ich sege dich nimmar mear! Maina Maria in Hümmel, pitt'vor mich. Dorparmet ist och der Hümmel az sovel Gapetach von allen. Darnach sechs Manote der Betag ist auszalest, un der brave Arzot müz sain gabest müde mit sovel Galofach Tag un Nacht. De Hölfe ist zua garegent vor de Armen, de Hertzar saint alle dorlinnart in alle Loite. Kloan ist gamacht segan hia 'z Hertze von 'me Comaune vor de Sîchen. Ich pin vorkemmet vil übele, mit pösen Boart un andare Uebele, ba ich vorporge un vorgesse-se se net so lange ich lebe, ba mir vil habent gaschadet. In disa Zait ist minsig dorkant der ba tüt bol 'me Comaune.

Bohüt-iz Gott von alleme Bea, ba hia zualoant übar de Kindar un übar alle de armen Lentegen.

Mit den pesten Grüzen allen den dain von Hause, bolaibet gasund un vor vil Jar noch vorkoffet an grozen Haufen Holtz un Kol, ba kimet von 'me raichen Balde at-te hogen Perge.

Der dain Vroint

BENEDICKT GHIT VON PUTZ

Rován, den 27 August 1902